

Engola il luf nies spazi da viver?

«La libertad ei in animal miraculus che fa tema a biars carstgauns.» Cun quels plaids dil cantatur Georg Danzer ha il moderatur dil Forum per la cultura dalla pasch a Glion beneventau mesjamna var 30 participontas e participonts ad ina discussiun davart il luf cun la sora dominicana Ingrid Grave ed il cusseglier naziunal Martin Candinas.

MARTIN GABRIEL/FMR

«Jeu sun surstaus che Vus fageis ils medems quitaus sco jeu pervia dil luf. Quei ha *Martin Candinas* getg pliras gadas a sora *Ingrid Grave* durent la spassegiada entuorn Glion. Fertun che sora Ingrid ha raquintau da sias temas e da ses discuos cun ina pura da nuorsas che fa quitaus pervia dil luf, ha Martin Candinas rapportau da sias experientschas politicas en connex cul luf. Gia cuort suenter la partenza dall'excursiun, eisi stau clar, ch'ei vegn buca a dar ina discussiun controversa davart il luf. Biaronz han ils dus protagonistas dalla spassegiada mess el center igl aspect dalla pasch denter animal e carstgaun e la damonda, tgi che ha il dretg sil spazi da viver.

Francestg d'Assisi e la pasch denter luf e carstgaun

Il luf seigi in animal miraculus, scrivan ils organisaturs dalla spassegiada el program. Purs, catschadurs e biaras persunas privatas vesien il luf sco inimitg. Ed en l'invitaziun sedamond'ins, sch'il luf hagi meritau quella rolla?

Sora Ingrid Grave ha detg, che la derasaziun dil luf el Grischnun seigi inacceptabla per ella. El medem mumment s'engaschi ella denton per in dialog. «Jeu less metter a cor a tuts l'enconuschenta legenda da Sogn Francestg d'Assisi ed il luf da Gubbio. Francestg haveva contonschiu ch'il luf che scarpava nuorsas, era vegnius dumistics e da-



Martin Candinas e sora Ingrid Grave durent la spassegiada.

FOTO MARTIN GABRIEL

ventaus siu amitg.» Clar, che quei seigi ina legenda naiva, ha la sora dominicana manegiau. Mo cun il dialog con-

struttiv havessi ins forse success. Martin Candinas ha concediu ch'ei hagi dau ina polarisaziun ella discussiun cunzun

denter populaziun dils marcaus ella Bassa e la populaziun dalla muntogna. «Las discussiuns davart il luf ein per

part plein odi. Jeu survegnel mintg'jamna mails e brevs cun cuntegns che jeu less buca numnar cheu.» Ad interim seigi ei aschia ch'els lufs semultiplichschien aschi fetg ch'els vegnien a sedomicilar era ella Bassa. Forsa ch'il dialog sin palancau naziunal daventi pli constructiv sche la populaziun dils marcaus e dalla Bassa fetschi era experientschas directas ella confruntaziun cul luf, ha Candinas detg. Cert ei che omidus protagonistas da l'excursiun entuorn Glion han negins problems fundamentals cun l'existenza digl animal scarpont. Ton Grave sco Candinas ein denton dil meini ch'ei hagi memia biars lufs e che quels stoppien vegnir decimai ton pli spert.

Participonts interessai

Il dus acturs principals dalla spassegiada dil forum per la pasch ein vegni confruntai cun pliras damondas dils participonts e dallas participontas.

Anavos el museum ha in in manegiau ch'il cusseglier naziunal hagi giu in semper giug oz. «Ei setracta buca ton dil semper giug, mobein dalla moda e maniera co ina tematica difficila sco quella dil luf vegn discutada», ha in'otra participonta manegiau.

Sora Ingrid Grave e Martin Candinas han en mintga cass resentiu il discuos sco interessants ed adattaus per quei forum che metta era la discussiun pascheivla e constructiva el center.

«Jeu sai buc tschintschar pils bulius»

Ils ins dian ch'ei tut bugli da bulius mellens il mument, ei seigi tut mellen ed ins sappi strusch nua passar. Auters anflan mo enzacons per far ina tschavera ed era la controlladra da bulius, Lia Heini-Piacentini relativescha e manegia che quei seigi da regiun tier regiun different.

SUSI ROTHMUND/FMR

Ensem cun *Egmont Heisch* da Cumbel meina *Lia Heini-Piacentini* il Post da cussegliaziun da bulius dalla Surselva. A Glion han ei entschiet miez fenadur cullas controllas e sco ei dian, han gia dabia persunas vegnidas e nezegiau la caschun da schar controllar lur raccolta. «La sesiun da bulius ha entschiet baul uonn. Ei ha pluviu e pluviu e cunquei ch'igl ei fetg bletsch han tuts interess dils bulius, naven dallas medias entochen tier la gliued che va a tscherchar els», declara Lia Heini-Piacentini.

Tut mellen

La dunna ch'enconuscha rodond 350 sorts senza consultar cudischs (en Surselva creschan ver 1500 sorts), ei adina puspei pils uauls entuorn. Ella habitescha a Siat e ha constatau ils davos dis ch'ei ha buca biars bulius, era la variaziun ei plitost mudesta. Ei hagi il mument bein empauet bulius - da tuttas sorts en siu contuorn, denton buca extrem biars. Tut auter tuna ei sissum la Surselva, leu hagian gia entginas persunas raquintau ch'ei hagi tut mellen ed ins sappi strusch nua passar. Alla FMR ha in um che va gia dapi 40 onns per bu-

lius perfin tradiu ch'ei seigi horrend, el hagi aunc mai viu tons bulius sco uonn. Tenor Lia Heini-Piacentini eis ei propi ina caussa regionala sche buca locala. La plievgia fetschi secapescha bein, mo ei seigi strau brav freid ed ei drovi era avunda sulegl e cauld per far crescer ils bulius. Avon dus onns seigi ei stau schitgira ed ei havevi tuttina massa bulius. «Igl ei grev da dir tgei ch'els drovan exact, quei ei empau in misteri ed jeu sai buc tschintschar pils bulius. Tut che spetga sin els e tuttina fan ei tgei ch'ei vulan. Jeu sai buca far prognosas», manegia ella riend.

Ei ha plazs e bulius per tuts

Il mument ein bulius in tema omnipresent. Sco l'amatura dalla micologia declara, eis ei denton aunc baul da tschintschar dalla sesiun da bulius. Quella entschievi numnadamein savens per miez uost. Sco Lia Heini-Piacentini di, entaup ella adina puspei era Talians che vegnan en Surselva per bulius. Era ils jasters hagian declarau tscheidi ch'ei hagian stuiu ir pulit lunsch per anflar ils dus kilos lubi. «Quei era persunas che vegnan dapi 20 onns cheu per bulius. Ei han raquintau co ei vegnevan tarschanai dils indigens avon onns, quei ha tut fatg star

agradi ils cavels, ed aunc oz manca il respect visavi ils vischins dall'Italia enqualga», di la dunna che ha sezza ragischs talianas. Forsa vesi ella perquei empau auter quei dils hosps che vegnan per bulius: «Ei ha en mintga cass loghens e bulius avunda per tuts. Igl impurtont ei d'have respect e quita dalla natira e digl uaul e leu ein ils Talians nuota menders che nus Svizzers.»

Las indicaziuns davart cuors, excursiuns ed ils termins per controllas da bulius en differents loghens ein d'anflar silla pagina d'internet www.pilzberatungsurvelva.info. Las controllas ein gratuitas.



Ils bulius mellens ein tschercai. En certs loghens ha ei uonn para tons sco aunc mai.

FOTO MAD



La sesiun da bulius ha entschiet baul uonn. Ei ha era bulius tschep sco quei bi exemplar enzanua en Surselva.